

DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ
Orthodoxorum Medicorum Patrono.

QUÆSTIO MEDICA, *

QUOD LIBETARIIS DISPUTATIONIBUS
manè discutienda in Scholis Medicorum, die Jovis, vigesimo-septimo mensis
Junii, anno Domini M. DCC. LIV.

M. CAROLO GILLOT, Doctore Medico,
Præside.

An perficiendis Medicis necessaria Peregrinatio?

I.



EDICINA Princeps Artium: hujus professores multi, possessores pauci. Quidam altiores ex eo spiritus gerunt, ac cæteris præire se putant, vel quòd in anatome versati sint; vel quòd medicamentorum, quæ ex mineralibus, vegetabilibus, animalibus eruuntur, naturam ac differentias probè calleant; vel quòd sciant quâ ratione opera chimica perficiantur, quæ menstrua commodiora sint mixtis fermentandis, aperiendis, solvendis, ac quidquid habet arcani vel miraculi chimia. Hæc sanè sunt egregia, pro merito vix satis laudanda; sed quot alia requiruntur in Medicis, ut penso ritè suo defungantur? His prædictis dotibus Pharmacopola vel alius quivis extolli, non ex omni parte Medicus potest commendari. Gloriantur agyrtæ se labore usque eò profecisse, ut qualvis ægitudines solâ unius medicamentis operâ depellant, sed cùm spem hujus beneficii facere conantur, sæpè maleficii vel etiam homicidii rei convincuntur. Sunt qui pulveres, quos sympathiæ vocant, ut miræ virtutis ad morborum curationem prædicant; alii periaptis, periamatis, amuletis, impressis characteribus, aut prolatis vocibus ægitudines profligari affirmant: has ineptias, fabulæve spernit quisquis veræ Medicinæ cultor. Ut ad hujus artis perfectionem quis assurgat, nihil sibi antiquius esse debet quàm ut firmâ doctrinæ fundamenta jaciât; quod præstare vix poterit, nisi libros Hippocratis legat assiduè. Ab his morborum historiam accipiet, quibus è causis illi prodent, quibus convenient signis, quibus discrepent, quæ signa boni vel mali sint omnis. Hæc postquàm diù fuerit meditatus, quæ vera quæ certa sit firmandi norma seriò cogitabit; à præceptis Medicinæ Principum nunquàm desisteret, qui Naturam ducem optimam sequuntur. Insuper ab ipso usu, rerum Magistro multa docebitur remedia, quibus affectiones vel leves vel graves tollantur. Hæc omnia quisquis studio constantiori fuerit adeptus, Medici famam nomenque decusque apud omnes relaturus est: sed illa Medicinæ bona non eruantur

* M. HENRICI MAHIEU, Anno 1696.

A

ex musæo, non à præceptore accipiuntur, non pretio, aut precibus obtinentur. Quot sunt scitu digna quæ litteris minimè prodita sunt? quot obscura, quæ non videntur ab occultatoribus? Quòd si medicis opibus abundare velis, tibi que nec remedium deesse cupias quo subvenias ægrotantibus, linquenda domus paterna, mutandum natale solum, trans mare currendum, cælum ipsum sapientiâ petendum.

I I.

ARTEs quælibet non nisi ope quorundam instrumentorum exercentur. Hinc Medicina non nisi pluribus adjuta præfidiis operatur; quamobrem multos habet ministros qui ab ejus pendent nutibus, qui vocati jussa statim exequuntur. Chirurgia innumeris abundat instrumentis, quibus indigemus. Omni genere quoque Pharmacia luxuriat instrumentorum, quibus adornat quodque remedium; sed hæc communia, pervulgata Medicinæ præfidia, quibuscum multa, non omnia conficiuntur. Philosophia mentis humanæ jubat, non leve confert Medicis subsidium; vocum ferè non intelligendarum tenebris olim sepulta fuit, nunc pluribus experimentis stabilita maximum habuit incrementum: gladio micante ignis partes mixtorum secantur: quæ sensus fugiebant, sunt manifestiora: quæ sit indoles succorum quibus alluuntur & aluntur nostra corpora, quæ natura medicaminum declaratur. Hypothesis acidi & alcali plura phænomena dilucidat. Plerique Medicinam ab Astrologiâ vires quasdam mutuari scribunt, ipse Hippocrates, ad astrorum ortus & occasus attendebat, ut prudentius exhiberet purgantia remedia; & certè ab Astronomiâ aliquid commodi percipi aliquando potest. Solertia medentis in explicando quæ sunt obscura, sagacitas in distinguendo quæ sunt æquivoca, judicium in exponendo quæ sit sedes, quæ causa continens ægritudinis, miros affert laboris fructus. Prudentia quæ scientia est de rebus eo loci præstandis, ut in omni vitâ, sic in Medicinâ multum valet. Quin & eloquentia non mediocriter prodest Medicis: hæc facit suaviora consilia medentium, dulci sermone asperitatem inorborum & remedium emendat. Quicumque hæc intra manus habet adjumenta, velut cataphractus miles ad pugnam, sic ad exercitium Medicinæ paratus accedit, nec aliud sibi deest, nisi ut peregrinatione perficiatur.

I I I.

IBIDEM loci vitam omnem agere, labor ac dolor: animus varietate locorum oblectatur, diversorum hominum colloquio durescit. Ut non omnis fert omnia tellus, sic artes quævis non uno loco natæ. Ars Medica longè diffusa, sed variâ, variis in locis, sunt curationis artes excogitatæ. Nonnullarum stirpium cognitione ac usu, tota medicina apud agrestes viros continetur; constat pluribus præceptis & experimentis apud doctos, ex quibus probè simul coherentibus nomen artis refert; quapropter nimis illam deprimunt qui tantum conjecturis innixam volunt. Jam inde antiquitùs coli cæpit, vix à Romanis tractata, plurimum à Græcis exulta; decursu temporum innumeræ sunt morborum curationes inventæ: sive quòd commodiora remedium genera fuerint usurpata, sive quòd sicut vîs in cælis nova sydera, ita etiam novi morbi caput extulerint. Sic variolæ nec ab Hippocrate nec à Galeno descriptæ, sic Syphilis, patribus nostris ignota, grassari cæpit in vulgus, indeque multa medicamenta, vel eorundem variæ præparationes medicinam auxerunt. Interea Mercurius & Antimonium hoc ævo nostro fuerunt celeberrima, *virtutibus efficacissima* medicamina. Peruviano cortici, Brasiliensi radici magnus honos habitus. Felix ætas nostra tot ferè medicinæ videtur addidisse, quot à patribus accepisse. Hinc tanta laus anatomicorum nostrorum à quibus tot partes in

homine veteri recēns detectæ sunt, sanguinisque circuitus, si non repertus; certè multum illustratus; hunc enim Hippocrati *subodoratum* fuisse, tanti viri scripta testantur, multique post Hippocratem & antè Harvæum eandem sanguinis circuitus sententiam amplexi sunt; sed hujus doctrinæ, si minùs inventrix, certè restauratrix & propugnatrix atas nostra dici debet. Chimia paucorum hominum antè scientia, nunc plurimorum est, atque indè quanta remedium supellex! Quantumvis verò provida prædicetur natura, tamen non omne solum ferax optimorum remedium. Quin etiam si Plinio fides, patrii cibi præstantiores, præstantiora medicamina peregrina. Adeòque ex pluribus Orbis partibus, Medicus reittere potest bona, gemmis & auro pluris æstimanda. Qui vel à Græcis vel Arabibus medicinam omnem doceri se posse putat, fallitur, quot sunt, quibus authores illi nullatenus cogniti, qui tamen medicinam profitentur non inglorii? Quilibet Doctor à Doctore potest edoceri, sed is perfectior Medicus evadet, qui quamcumque sanandi rationem exul patriæ meditatus fuerit, factò examine compertierit quâ viâ certius apud plerasque gentes deperdita sanitas recuperetur, quique usus fuerit variorum hominum in medicinâ spectatissimorum consortio.

I V.

MEDICUS cenferi non debet qui hominem nescit, hominem scire perfectè sine peregrinationis auxilio vix possumus: similis quidem ubique corporis humani structura, sed quàm dissimilis temperies, quàm dissimiles affectiones! hinc qui plagas habitant Orientales, ut plurimum ignavi; qui verò Septentrionales, laborum patientissimi. Hinc generosa gens Polonorum pro libertate tam strenuè pugnat, pane secundario læta pascitur, aquâ vel cerevisiâ vino salubriori sitim jucundè fallit. Ni secedas à patriâ quid homo præstet hominibus, quantum hic populus ab alio distet, ægrè intelliges. Variæ morborum species sæviunt in genus humanum ab aëre vario, à variis cibis. Hinc Indis Venerea lues, Italis Melancholia, Strumæ Hispanis, Plica Polonis, Scorbutus Danis, Phthisis Anglis, Alpinis Bronchocele quali gentilitio jure propria. Ut gens quælibet singulares à naturâ dotes, sic morbos habet, variam quoque medendi methodum; quæ omnia latent eos qui semper in iisdem oppidulis latitant. Hic, si quis in morbum incidat, huic statim potus aquæ vitæ mixto pipere propinatur; hic, catharticum remedium jam jam exhibetur; hic, per vomitum oggeritur; hic, refrigerantibus; hic, calefacientibus febres oppugnantur. Fluor alvi spes optimæ crisis apud aliquos audit, apud alios sudor, quòd lymphæ degener, ægritudinis cujusque causa credatur. Frequens apud multos usus enematum, apud Moscovitas nullus, apud Lusitanos venæ sectio ferè pro omni remedio est, apud nos quoque sæpius ex usu, parcius tamen quàm antè sanguinem fundimus, nec inconsultò. Ab Italis venæ secantur inferiores potiùs quàm superiores, & id rarò. Ab Hispanis ex utroque simul brachio vel crure sanguis educitur, ut æquilibrium sanguinæ molis servetur. Magna igitur populorum dissensio in medendi ratione, sed ad hanc opinionum discordiam rectè si attendatur, non parva rebus Medicis adferri lux potest, plurima indè deduci possunt documenta, quæ valdè profint ad rectè medendum, sed hæc præstari facili non possunt ab eo qui semper in eodem oppidulo degit.

V.

NON eadem rerum facies apud quasilibet gentes, non idem rerum ordo. Stat nihilominus apud omnes imperii dignitas, inter cives tranquillitas: quid ni etiam pax humani corporis variâ ratione firmetur, sanitas servetur aut restituatur. Sed quemadmodum in vita civili sapientiùs se gerunt qui multiplices urbes viderunt, varias hominum mores exploraverunt, quidni peri-

4

tiores sint in medendo, qui multas & aliquatenus oppositas curationis artes probaverunt? Certè brevioribus pagi aut oppiduli coercita limitibus Medicorum industria, quid melius in praxi difficilius attingit; illorum aliqui sicut eandem eunt redeuntque viam, sic eodem ferè modo cunctis opitulantur ægrotantibus; assiduus incola pagi vel oppiduli Medicus, plebis favorem ambit sæpè numero; quod bonum ut adipiscatur, consuetudini patriæ, tritoque remedium usui magis servit, quàm enodationi veritatis. Amplioribus patent limitibus magnæ civitates, ac præcipuè Parisiorum Lutetia, quæ quasi totius Orbis compendium, innumeros omnium penè nationum homines complectitur, & in quam non è Galliâ modò, verùm etiam ex omnibus propemodum Europæ regionibus, admirabiles ac sæpè inauditi morbi vel curandi vel dijudicandi perferuntur. Hæc Urbs populosa omnia ferè Medicis suppeditat peregrinationis commoda: ita ut iis qui utitur sedulò, licèt in eadem urbe degat, peregrinantium tamen bonis frui quodammodò videatur. Medicina Philosophiæ soror: hæc, mox in hanc, mox in illam orbis partem ferri delectata est, ut mundi totius ænigma, si fieri posset, aliquandò solveret. Quamobrem Plato, Pythagoras, alique perillustres viri, dissitas à patriâ gentes adiverunt, ut certior de rebus haurirent scientiam. Quod si, velut ex Pergamo profugus, Romam non venisset Galenus, contrà methodicos non pugnasset, non perdidisset αἰμαφελὲν Εραφιστραtum, non tam facillè eduxisset veram medicinam in apertam lucem. Romani quondam rerum domini, tantùm sibi arrogabant, ut modum agendi suum, in omnibus, æqui rectique regulam arbitrarentur; hos Velleius Paterculus inanis jactantiæ reos insinuat: apud exterarum gentes multa recepta consuetudine scribit, consultiora, quàm quæ gererentur à Romanis. In eundem superbiæ scopulum ne allidat, caveat Medicus qui sic adhæret cuidam hæresi, suum ut examinem castigare nolit in alienâ trutinâ. Aliorum dicta vel facta, consilia vel experimenta perpendere debemus; ut rebus omnibus æquâ lance libratis, non ceratinâ disputatione sed maturo judicio discussis, quid melius, quid æquius, prudentissimè concludamus.

Ergò perficiendis Medicis necessaria Peregrinatio.

DOMINI DOCTORES DISPUTATURI.

M. Honoratus Petiot,	M. Petrus - Ludovicus - Maria Maloet.	M. Gedeon de Rabours.
M. Ludovicus - Anna Lavirotte, Censor Regius.	M. Alexander - Dionysius Dierert.	M. Laurentius Ferret.
M. Ludovicus - Petrus - Felix Renatus le Thieullier, Regis Consiliarius, in majori Consilio, nec-non in magnâ Regia Domûs & Franciæ Præfectorum Medicus ordinarius.	M. Carolus Gaille de S. Leger,	M. Carolus Dionis.

Proponebat Parisiis PETRUS - JOSEPHUS MORISOT DESLANDES,
Catalaunensis, Saluberrimæ Facultatis Medicinæ Parisiensis Baccalaureus,
A. R. S. H. 1754. A SEXTA AD MERIDIEM.

Typis Viduæ QUILLAU, Universitatis & Facultatis Medicinæ Parisi, Typog. 1754.